

PEMBERITAHUAN PERTANYAAN

DEWAN RAKYAT, MALAYSIA

DARIPADA : Y.B. TUAN WONG CHEN
(KELANA JAYA)

PERTANYAAN : LISAN

TARIKH : 08.03.2016

Y.B. TUAN WONG CHEN [KELANA JAYA] minta **MENTERI KEWANGAN** menyatakan anggaran kedudukan fiskal Kerajaan bagi tahun 2016.

JAWAPAN

Untuk makluman Ahli Yang Berhormat,

Kerajaan kekal komited dalam melaksanakan langkah konsolidasi fiskal

walaupun berhadapan dengan persekitaran ekonomi global dan domestik yang semakin mencabar. Langkah ini adalah bagi memastikan kedudukan kewangan Kerajaan terus kukuh dan kemampanan fiskal negara dalam jangka masa sederhana dan panjang. Mengambil kira pertumbuhan ekonomi global yang lebih perlahan dan jangkaan penurunan harga minyak mentah dunia serta kesannya kepada hasil Kerajaan Persekutuan, Bajet 2016 yang dibentangkan pada Oktober 2015 telah diubahsuai pada 28 Januari 2016.

Dalam Bajet 2016 yang diubahsuai, Kerajaan telah menyemak semula andaian harga minyak mentah dunia (*Dated Brent*) daripada USD48 setong kepada paras di antara USD30 hingga USD35 setong. Oleh itu, hasil berkaitan petroleum dianggarkan turut berkurang dengan jumlah di antara RM7 bilion hingga RM9 bilion. Bagi mengimbangi penurunan hasil tersebut, langkah mengoptimum dan mengurangkan ketirisan perbelanjaan mengurus akan terus dilaksanakan. Di samping itu, projek dan program pembangunan akan disusun semula keutamaan dengan penekanan diberikan kepada program dan projek yang memberi kesan pengganda yang tinggi kepada ekonomi.

Untuk makluman Ahli Yang Berhormat,

Dengan mengambil kira kedudukan terkini, paras defisit fiskal bagi tahun 2016 kekal disasarkan pada 3.1% daripada KDNK (2015: 3.2% daripada KDNK) dan paras defisit ini akan dikurangkan secara berperingkat pada tahun-tahun akan datang ke arah mencapai bajet berimbang pada tahun 2020. Langkah ini juga adalah penting bagi memastikan paras hutang kekal rendah dan terkawal di bawah paras 55% daripada KDNK.

SOALAN (60)

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**TARIKH : 8 MAC 2016
[SELASA]**

**DARIPADA : Y.B. LAKSAMANA PERTAMA MOHAMAD
IMRAN BIN ABDUL HAMID
[LUMUT]**

SOALAN :-

Y.B. LAKSAMANA PERTAMA MOHAMAD IMRAN BIN ABDUL HAMID [LUMUT] minta MENTERI KESEJAHTERAAN BANDAR, PERUMAHAN DAN KERAJAAN TEMPATAN menyatakan apakah tindakan yang telah diambil ke atas Laporan Jawatan Kuasa Kira-Kira Wang Negara (PAC) DR 9 Tahun 2014 mengenai Pengurusan Loji Insinerator.

JAWAPAN :-

Tuan Yang di-Pertua,

Untuk makluman Ahli Yang Berhormat, Kerajaan peka dan sentiasa berusaha menambahbaik penyampaian perkhidmatan dari semasa ke semasa. Laporan Jawatankuasa Kira-Kira Wang Negara (PAC) pada tahun 2014 mengenai pengurusan loji insinerator telah mencadangkan beberapa tindakan penambahbaikan oleh pihak Kerajaan. Lanjutan daripada itu, Kerajaan telah mengambil tindakan-tindakan berikut :

- i. Menambahbaik *Standard Operation Prosedure (SOP)* loji berdasarkan keupayaan loji sedia ada;
- ii. memantau pengoperasian dan penyelenggaraan loji setiap dua (2) minggu berdasarkan *Key Performance Indicators (KPI)* yang ditetapkan;

- iii. mengambil pendekatan kaedah bayaran operasi secara *tipping fee* berbanding kaedah bayaran secara *lump sum* dalam kontrak terdahulu; dan
- iv. Kerajaan akan melaksanakan perolehan tender secara tender terbuka atau tender terhad mengikut kesesuaian sesuatu kontrak operasi bagi memastikan hanya operator yang berkepakaran dan mempunyai pengalaman menguruskan loji insinerator sahaja yang dilantik.

Kerajaan juga telah melantik perunding yang mempunyai kepakaran untuk membantu Kerajaan menilai semula keupayaan teknikal bagi keempat-empat loji insinerator tersebut serta membuat kajian terperinci dari segi reka bentuk, pembinaan dan pengoperasian agar kecekapan loji insinerator dapat mencapai tahap yang optimum.

Kementerian Kesejahteraan Bandar,
Perumahan dan Kerajaan Tempatan

Mac 2016